

永平府志卷之十八



萊陽宋 琬撰次

府學訓導徐 香叅訂

蕭山張朝琮續纂

盧龍教諭胡仁濟校輯

人物前

自古哲士偉人多奮跡於邊陲之地况永平爲燕東大郡夷齊二子之故墟自漢以來垂名史冊者代不乏人乃昔之爲書者不讀全史於本郡之人多闕遺未攷而旁援它郡之賢者以附益之是果足爲永平重耶夫田疇無終人玉田縣志詳之矣韓麒麟豆盧

永平府志

卷之十八

一

通之屬皆古昌黎人李光弼姚樞皆柳城人在今之塞外以其無志可書而附之猶可也遂以爲今之昌黎非也且夫古之內郡而今淪於徼外者多矣交趾之往哲不聞祀於廣西朔方之舊勲不聞報於寧夏以載記及北史攷之古昌黎之傳人多矣可盡書耶今志皆不取焉而錄郭涼以下諸人之犖犖見於史傳者其餘別爲一則以俟後之君子考焉

後漢郭涼字公文右北平人身長八尺氣力壯猛雖武將然通經書多智略尤曉音有名北方初幽州牧朱浮辟

爲兵曹掾擊彭寵有功少武侯建武九年爲鴈門太守
與驃騎大將軍杜茂擊盧芳將尹由于繁時其將賈丹霍
匡解勝等殺由詣涼降詔送委輸金帛賜茂涼軍吏自是
盧芳城邑稍稍來降涼誅其豪右郇氏之屬鎮撫羸弱旬
月間鴈門平芳亡入匈奴帝擢涼子爲中郎宿衛左右
魏攸右北平人爲幽州牧劉虞東曹掾虞與公孫瓚有怨
密謀於攸攸曰今天下引領以公爲歸謀臣爪牙不可無
也瓚文武才力足恃雖有小惡固宜容忍虞乃止頃之攸
卒虞積忿不已率屯兵十萬攻瓚大敗爲瓚所殺

永平府志

卷之十八

二

公孫瓚字伯珪遼西令支人家世二千石瓚以母賤遂爲
郡小吏爲人美姿貌大音聲言事辯慧太守竒其才以女
妻之後從涿郡盧植學於緱氏山中略見書傳舉上計吏
太守劉君坐事檻車徵官法不聽吏下親近瓚乃改容服
詐稱侍卒身執徒養御車到洛陽太守當徒日南瓚具豚
酒於北部上祭辭先人酌觴祝曰昔爲人子今爲人臣當
詣日南日南多瘴氣恐或不還便當長辭墳塋慷慨悲泣
再拜而去觀者莫不嘆息旣行於道得赦瓚還郡舉孝廉
除遼東屬國長史嘗從故騎出行塞下卒逢鮮卑數百

騎瑣乃退入空亭約其從者曰今不奔之則死盡矣乃自持兩刃矛馳出衝賊殺傷數十人瓚左右亦亡其半遂得免中平中以瓚督烏桓突騎車騎將軍張溫討涼州賊會烏桓反叛與賊張純等攻擊薊中瓚率所領追討純等有功遷騎都尉純復與畔胡丘力居等寇漁陽河間勃海入平原多所殺掠瓚追擊戰於屬國石門鹵遂大敗棄妻子踰塞走悉得其所掠男女瓚潑入無繼反爲丘力居等所圍於遼西管子城二百餘日糧盡食馬馬盡煮弩楯力戰不敵乃與士卒辭訣各分散還時多雨雪墜阮死者十五

六鹵亦飢困遠走柳城詔拜瓚降虜校尉封都亭侯復兼領屬國長史職統戎馬連接邊寇每聞有警輒厲色憤怒如赴讐敵望塵奔逐或繼之以夜戰虜識瓚聲憚其勇莫敢犯瓚常與善射之士數十人皆乘白馬爲左右翼自號白馬義從烏桓更相告語避白馬長史乃畫作瓚形馳騎射之中者咸稱萬歲虜自此之後遂遠竄塞外瓚志埽滅烏桓而劉虞欲以息信招降由是與虞相忤初平二年青徐黃巾三十萬衆入勃海界欲與黑山合瓚率步騎二萬人進擊於東光南大破之斬首三萬餘級賊棄其車重數

萬兩奔走渡河瓚因其半濟汭之賊復大破死者數萬流
血丹水收得生口七萬餘人車甲財物不可勝算威名大
震拜奮武將軍封薊侯及瓚與袁紹有隙乃上疏數紹之
罪舉兵攻紹於是冀州諸城悉畔從瓚瓚乃自署其將帥
爲青冀交三州刺史又悉置郡縣守令與紹大戰於界橋
瓚軍敗還薊紹遣將崔巨業將兵數萬攻圍故安不下退
軍南還瓚將步騎三萬人追擊於巨馬水大破其衆死者
七八千人乘勝而南攻下郡縣遂至平原遣其青州刺史
田楷據有齊地紹復遣兵數萬與楷連戰二年紹乃遣子
永平府志

卷之十八

四

譚爲青州刺史楷與戰敗退還是歲瓚破禽劉虞盡有幽
州之地前此有童謠言燕南垂趙北際中央不合大如礪
唯有此中可避世瓚自以爲易地當之遂徙鎮焉乃盛修
營壘樓觀數十臨易河通遼海劉虞從事漁陽鮮于輔等
合率州兵欲共報瓚輔以燕國閭柔素有恩信推爲烏桓
司馬柔招誘口漢數萬人與瓚所置漁陽太守鄒丹戰于
潞北斬丹等四千餘級烏桓峭王率種人及鮮卑七千餘
騎共迎虞子和與袁紹將麴義合兵十萬共攻瓚與平二
年被瓚于鮑丘斬首二萬餘級瓚遂保易京開置屯田稍

得自支相持歲餘趙義軍糧盡士卒飢困退走瓚邀破之
盡得其車重是時旱蝗穀貴氏相食瓚恃其才力不恤百
姓記過忘善睚眦必報州里善士名在其右者必以法害
之常言衣冠皆自以職分富貴不謝人惠故所寵愛類多
商販庸兒所在侵暴百姓怨之於是代郡廣陽上谷右北
平各殺瓚所置長史復與輔和合兵瓚慮有非常乃居於
易京以鐵爲門斥去左右男人七歲以上不得入門專侍
姬妾其文簿書記皆汲而上之令婦人習爲大言聲使聞
數百步以傳宣教令踈遠賓客無所親信故謀臣猛將稍

稍乖散自此之後希復攻戰或問其故瓚曰昔我驅畔口
於塞表掃黃巾于孟津當此之時謂天下指麾可定至于
今日兵革方始觀此非我所決不如休兵力耕以救凶年
兵法百樓不攻今吾諸營樓櫓千里積穀三百萬斛食此
足以待天下之變建安三年袁紹復大攻瓚瓚遣子續請
救於黑山諸帥而欲自將突騎直出傍西山以斷紹後長
史關靖諫瓚乃止及紹漸相攻逼瓚衆日蹙乃却築三重
營以自固四年春黑山賊帥張燕與續率兵十萬三道來
救未至瓚乃密使行人齎書告續期于北隰中舉火爲應

紹侯得其書如期舉火瓚以爲救至遂出戰紹設伏瓚遂大敗復還保中小城自計必無全乃悉縊其姊妹妻子然後引火自焚紹兵趣登臺斬之續爲屠各所殺

吳程普字德謀右北平土垠人初爲州郡吏有容貌計畧善於應對從孫堅征伐討黃巾於宛鄧破董卓于陽人攻城野戰身被創夷堅薨復隨孫策在淮南從攻廬江拔之還俱東渡策到橫江當利破張英于廩等轉下秣陵湖熟句容曲阿普皆有功增兵二千騎五十匹進破烏程石木波門陵傳餘杭普功爲多策入會稽以普爲吳郡都尉治

永平府志

卷之十八

六

錢塘後徙丹陽都尉居石城復討宣城涇安吳陵陽春穀諸賊皆破之策嘗攻祖郎大爲所圍普與一騎共蔽扞策驅馬疾呼以矛突賊賊披靡策因隨出後拜盪寇中郎將領零陵太守從討劉勲於潯陽進攻黃祖于沙羨還鎮石城策薨與張昭等共輔孫權遂周旋三郡平討不服又從征江夏還過豫章別討樂安平之代太史慈備海昏與周瑜爲左右督破曹公於烏林又進攻南郡走曹仁拜裨將軍領江夏太守治沙羨食四縣性好施與喜士大夫周瑜卒代領南郡太守權分荊州與劉備普復還領江夏還盪

寇將軍卒權稱尊號追論普功封子咨爲亭侯

韓當字義公遼西令支人以便弓馬有膂力幸於孫堅從征伐周旋數犯危難陷敵擒虜爲別部司馬及孫策東渡從討三郡遷先登校尉授兵二千騎五十匹從征劉勲破黃祖還討鄱陽領樂安長山越畏服後以中郎將與周瑜等拒破曹公又與呂蒙襲取南郡遷偏將軍領永昌太守宜都之役與陸遜朱然等共攻蜀軍於涿鄉大破之徙威烈將軍封都亭侯曹真攻南郡當保東南在外爲帥厲將士同心固守又敬重督司奉遵法令權善之黃武二年封永平府志

卷之十八

七

石城侯遷昭武將軍領冠軍太守後又加都督之號將敢死及解煩兵萬人討丹陽賊破之會病卒子綜襲侯領兵綜濞亂不軌懼罪載父喪將母家屬部曲男女數千人奔魏魏以爲將軍封廣陽侯數犯邊境權常切齒東興之後綜爲前鋒敗死諸葛恪斬送其首以白權廟

晉閻亨遼西人荀晞爲大都督督青徐六州諸軍事刑政苛虐縱憤肆欲亨以書固諫晞怒殺之

後魏衛冀隆遼西人官國子博士爲服氏之學上書難杜氏春秋六十三事

竇瑗字世珍遼西陽樂人自言今扶風平陵人漢大將軍
竇武之曾孫崇爲遼西太守子探遂家焉曾祖堪慕容氏
漁陽太守祖表馮弘成周太守八國父罔舉秀才早卒普
泰初瑗啟以身階級爲父請贈詔贈征虜將軍平州刺史
瑗爲御史轉奉朝請兼太常博士爲太原王爾朱榮所知
遂表留瑗爲北道大行臺左丞以軍功賜爵陽洛男除員
外散騎常侍封新昌男因從榮東討葛榮事平封容城縣
開國伯食邑五百戶除征虜將軍通直散騎常侍仍左丞
乞以容城伯讓兄叔珍詔聽以新昌男轉授之叔珍歷太
永平府志

卷之十八

八

山太守除征南將軍金紫光祿大夫敷奏侃然前廢帝甚
重之出帝時爲廷尉卿天平中除鎮東將軍金紫光祿大
夫尋除廣宗太守有清白稱轉中山太守加征東將軍爲
吏民所懷授使持節本將軍平州刺史在州政如治郡又
爲齊獻武王丞相右長史除大宗正卿尋加衛將軍宗室
以其寒上相與輕之瑗按法推治無所顧避官雖通顯貧
窘如初領本州大中正以本官兼廷尉卿卒官贈本將軍
太僕卿濟州刺史謚曰明

後周怡寧字景阜遼西人本姓默台因避難改爲高祖寬

燕遼西郡守魏道武時率戶歸朝拜羽真賜爵長蛇公會
祖文與州刺史峯少從征以驍勇聞永安中假龍驤將軍
爲都將從賀拔岳討万俟醜奴以功授給事中明威將軍
轉征虜將軍都督賜爵蒲陰縣男及岳被害峯與趙貴等
同謀翊戴太祖進爵爲伯時原州刺史史歸猶爲侯莫陳
悅守太祖令峯與侯莫陳崇討擒之及齊神武與魏孝武
帝構隙帝頻勅太祖簡銳卒入衛京邑太祖乃令峯與都
督趙貴等率輕騎赴洛陽至潼關值魏孝武西遷峯卽從
太祖返回洛復潼關拜安東將軍華州刺史尋轉大都督
二 齊平府志

卷之十八

九

討曹泥有功進爵華陽縣公邑一千戶大統二年從太祖
破竇泰於小關還拜散騎常侍車騎大將軍儀同三司又
從復弘農破沙苑進爵樂陵郡公仍與元季海獨孤信復
洛陽率奇兵至成臯入其郭收其戶口而還東魏遣行臺
任祥率步騎萬餘攻潁川峯復以輕騎五百邀擊之自是
威名轉盛加授開府儀同三司東魏圍洛陽峯與季海守
金墉太祖至圍解卽與東魏戰於河橋時峯爲左軍不利
與李遠先還太祖因此班師詔原其罪拜東西北三夏州
諸軍事夏州刺史後與于謹討劉平伏從解玉壁圍平栢

谷場並有功涼州刺史宇文仲和反峯與于謹討之十五年東魏圍潁川峯與趙貴赴援至南陽遇疾卒年五十峯沉毅有膽畧得士卒心當時號爲驍將贈華州刺史謚曰襄威子昂嗣官至開府儀同三司朝廷追錄峯功封昂鄭國公昂弟光少以峯勲賜爵安平縣侯起家員外散騎常侍累遷司土中大夫左武伯出爲汾涇豳三州刺史加開府儀同三司進爵龍河縣公光弟春少知名歷官吏部下大夫儀同三司

唐陽惠元平州人以趨勇事平盧軍從田神功李忠臣浮

永平府志

卷之十八

十

海入青州詔以兵隸神策爲京西兵馬使鎮奉天德宗初立稍繩諸節度跋扈者於是李正己屯曹州田悅增河上兵河南大擾詔移兵萬二千戍關東帝御望春樓誓師勞遣諸將酒至神策將士不敢飲帝問故惠元曰初發奉天臣之帥張巨濟與衆約是役也不立功毋飲酒臣不敢食其言旣行有饋於道惟惠元軍瓶壘不發帝咨歎不已璽書慰勞俄以兵三千會諸將擊田悅戰御河奪三橋惠元功多以兵屬李懷光及朱泚反自河朔赴難解奉天圍加檢校工部尚書攝貝州刺史詔惠元與神策行營節度使

李晟鄜坊節度使李建徽及懷光聯營便橋晟知懷光且
叛移屯東渭橋翰林學士陸贄請移惠元建徽二軍與晟
合帝不從懷光果奪二軍惠元建徽走奉天懷光遣將冉
宗馳騎追及於好畤惠元披髮呼天血流出皆袒裊戰而
死二子晟暉皆遇害建徽獨免詔贈惠元尚書左僕射晟
殿中監暉邠州刺史少子旻字公素惠元之死被八創墮
井以救得免歷邢州刺史盧從史旣縛潞軍潰有驍卒五
千從史嘗以子視者奔於旻旻閉城不納衆皆哭曰奴失
帥今公有完城又度支錢百萬在府少賜之爲表天子求

永平府志

卷之十八

十一

旌節旻開諭禍福遣之衆感悟遂還軍憲宗嘉之遷易州
刺史王師討吳元濟以唐州刺史提兵深入二百里薄申
州拔外郭殘其垣以功加御史中丞容州西原蠻反授本
州經畧招討使擊定之進御史大夫卒贈左散騎常侍
周寶字上珪平州盧龍人曾祖代選爲魯城令安祿山反
率縣人拒戰死之祖光濟事平盧節度使侯希逸爲牙將
每戰得攻魯城者必手屠之歷左贊善大夫從李洧以徐
州歸天子父懷義通書記系檢校工部尚書天德西城防
禦使以徙城事不爲宰相李吉甫所助以憂死寶藉蔭爲

千牛備身天平節度使殷侑嘗爲懷義叅軍寶從之爲部
將會昌時選方鎮才校入宿衛與高駉皆隸右神策軍歷
良原鎮使以善擊毬俱補軍將駉以兄事實寶寶彊毅未嘗
訕意於人官不進自請以毬見武宗稱其能擢金吾將軍
以毬喪一目進檢校工部尚書涇原節度使務耕種聚糧
二十萬斛號良將黃巢據宣歙徙寶鎮海軍節度兼南面
招討使僖宗入蜀加檢校司空時群盜所在盤結寶練卒
自守發杭州兵戍縣鎮判八都中和二年進同中書門下
平章事兼天下租庸副使封汝南郡王寶和裕喜接士以

永平府志

卷之十八

十一

京師賊陷將赴難益募兵號後樓都寶子與統後樓都孱
不能馭軍部伍橫肆寶亦稍惑聲色不卹事初鎮海將張
郁以擊毬事實光啟初劇賊剽崑山寶遣郁領兵三百戍
海上郁醉而叛寶遣將拓跋從討定之郁保常熟因攻常
州刺史劉韋迎降寶遣將丁從實督兵攻之郁走海陵從
實遂據常州及董昌徙義勝軍節度使寶承制擢杭州都
將錢鏐領州事高駉領鹽鐵辟寶子佶爲支使寶亦表駉
從子在幕府駉爲都統寢久不禮寶寶啣之帝在蜀淮南
絕貢賦謾言道浙西爲寶剽阻帝知其誣不直駉自是顯

隙駢出屯東塘約西定京師遣人請會金山謀執寶寶答曰平時且不聞境上會况上蒙塵宗廟焚辱寧高會時耶我非李康不能爲人作功動欺朝廷也駢遣人切讓寶亦詬絕之會部將劉浩刁頹與度支催勘使太子左庶子薛朗叛寶方寢外兵格鬪火照城中寶自青陽門出奔常州依丁從實召後樓都無一士至者錢鏐遣杜稜徐及攻薛朗稜子建徽攻從實聲言迎寶遂圍常州從實奔海陵鏐具橐鞬迎寶舍樟亭未幾殺之年七十四贈太保

宋郭瓊平州盧龍人祖海本州兩治使父令奇蘆臺軍使

永平府志

卷之十八

十三

瓊少以勇力聞事契丹爲蕃漢都指揮使後唐天成中挈其族來歸明宗以爲亳州團練使改刺商州遷原州清泰初移階州城壘未葺蜀人屢寇瓊患之因徙城保險民乃無患受詔攻文州拔二十餘砦生擒數百人晉天福中移刺涇州屬羗渾騷動朔方節度張希崇表瓊爲部署將兵共討平之連領滑坊號衛四州開運初爲北面騎軍排陣使陽城之役戰功居多改沂州刺史充荆口砦主兼東面行營都虞候擒莫州刺史趙思以獻改刺懷州俄爲北面先鋒都監契丹陷中原盜賊蠡起山東爲甚契丹主命瓊

魏朝沂州刺史禦盜瓊即日單騎赴郡盜聞瓊威名相率遁去漢乾祐中淮人攻密州以爲行營都部署未至淮人解去會平盧節度劉銖恃佐命之舊稱疾不朝將相大臣懼其難制先遣瓊與衛州刺史郭超以所部兵屯青州銖不自安置酒召瓊伏壯士幕下欲害瓊瓊知其謀屏去從者從容就席畧無懼色銖不敢發瓊因爲陳禍福銖感其言遂治裝俄詔至卽日上道瓊改潁州團練使又加防禦使蒞朗州結荆淮廣南合兵攻湖南詔瓊以州兵合王令溫大軍攻光州尋以內難不果罷歸朝遣詣河北計度兵甲

魏朝周祖祀南郊召權知宗正卿事世宗征劉崇爲北面行營都監歷絳蔡齊三州防禦使在齊州民饑瓊以已俸賑之人懷其惠相率詣闕請爲立碑宋憲隆三年告老加右領軍衛上將軍致仕歸洛陽乾德二年卒年七十二瓊雖起卒伍而所至有惠政尊禮儒士孜孜樂善蓋武臣之賢者也

姚內斌平州盧龍人仕契丹爲關西巡檢瓦橋關使周顯德六年太祖從世宗北征兵次瓦橋關內斌率衆五百人以城降世宗以爲汝州刺史吏民詣闕舉留恭帝詔褒之

從平李筠改虢州刺史西夏數犯西鄙以內斌爲慶州刺史兼青白兩池榷鹽制置使在郡十數年西夏畏伏不敢犯塞號爲姚大蟲內斌初降其妻子在契丹乾德四年子承贊密自幽州來歸五年幽州民田光嗣等又以內斌兒女六人間道來歸太祖並召見賜衣服緡錢鞍馬令中使護送還內斌開寶七年春卒年六十四遣中使護喪歸葬洛陽常賻外賜田三十頃承贊爲供奉官閣門祗候死于陣承鑒至殿中丞

陳思議字後已幽州盧龍人父審確仕後唐至晉歷檀順永平府志

卷之十八

五

涿均沁唐祁城八州刺史預征蜀權利州節度終金州防禦使思議初隸莊宗帳下卽位補右班殿直晉天福中轉東頭供奉官丹遷作坊使安從進叛於襄陽以思議爲先鋒右廂都監從武德使焦繼勳領兵進討遇從進兵於唐州花山下急擊大破之以功領獎州刺史從進平授坊州刺史八年冬契丹謀入寇以思議監澶州軍討楊光遠於青州又爲行營右廂兵馬都監兵罷改磁州刺史會符彥卿北征契丹思議表求預行未幾改衛州連丁內外艱時武臣罕執喪禮思議不俟詔去郡奔喪聞者嘉之起復隨

州刺史漢初移淄州罷任歸朝淮南攻湖南馬希廣來乞師令思讓往郢州赴援兵未渡而希廣敗思讓留於郢周祖卽位召思讓及所部兵還劉崇僭號太原遣思讓率兵詣磁州控扼澤潞未幾授磁州刺史充北面兵馬巡檢未行陞磁州爲團練卽以思讓充使廣順元年九月劉崇遣大將李瓌領馬步軍各五都鄉兵十都自團栢軍於塞子店思讓與都監向訓張仁謙等率龍捷吐渾軍至虢亭西與瓌軍遇殺三百餘人獲崇偏將王璠曹海金俄遣王俊援晉州以思讓與康延昭爲左右廂排陣使令率軍自烏

永平府志

卷之十八

六

嶺路至絳州與大軍合崇燒營遁去思讓又與藥元福襲之俄命權知絳州明年春遷絳州防禦使顯德元年改亳州防禦使充昭義軍兵馬鈐轄屢敗并人及契丹援兵遷安國軍節度觀察留後充北面行營馬步軍排陣使五年敗并軍千餘於西山下斬五百級改義成軍節度觀察留後六年春世宗將北征命先赴冀州俟命及得瓦橋關爲雄州命思讓爲都部署率兵戍守世宗不豫還京畱思讓爲關南兵馬都部署恭帝嗣位授廣海軍節度宋初加檢校太傅乾德二年爲保信軍節度皇子興元尹德昭納思

讓女爲夫人開寶二年夏改護國軍節度河中尹七年卒
年七十二贈侍中思議累歷方鎮無敗政然酷信釋氏所
至多禁屠宰俸祿悉以飯僧人目爲陳佛子沒後家無餘
財弟思誨至六宅使子欽祚累遷至香藥庫使長州刺史
欽祚子若拙字敏之幼嗜學思議嘗令持書詣晉邸太宗
嘉其應對詳雅將授以軍職若拙懇辭太平興國五年進
士甲科解褐將作監丞通判鄂州改太子右贊善大夫知
單州以能政改太常丞遷監察御史充塩鐵判官益州繫
囚甚衆太宗覽奏訝之召若拙面諭委以疏決遷殿中侍

永平府志

卷之十八

七

御史通判益州淳化三年就命爲西川轉運副使未幾改
正使召歸改度支員外郎通判西京留司久之遷司封員
外郎通判涇州部送芻糧至塞外優詔獎之入爲塩鐵判
官轉工部郎中與三司使陳恕不協改主判開拆司車駕
北巡命李沆留守東京以若拙爲判官河決鄆州朝議徙
城以避水患命若拙與閩承翰往規度尋命權京東轉使
因癸辛塞王陵口又於齊州浚導水勢設巨隄於采金山
奏免六州所科梢木五百萬民甚便之河平真授轉運使
召還拜刑部郎中知潭州時三司使缺若拙自謂得之及

是大失望因請對言父母年老不願遠適求納制命上怒
追若拙所授誥勅黜知處州徙溫州代還復授刑部郎中
再爲鹽鐵判官改兵部郎中河東轉運使賜金紫會親祀
汾陰若拙以所部緡帛芻粟十萬輸河中助費擢拜右諫
議大夫徙知永興軍府時鄰郡歲饑前政拒其市糴若拙
至則許貿易民賴以濟移知鳳翔府入拜給事中知澶州
蝗旱之餘勤於政治郡民列狀乞留天禧二年卒年六十
四錄其子映爲奉禮郎

遼趙思溫字文美盧龍人少果銳齊力兼人隸燕帥劉仁

永平府志

卷之十八

七

恭慕下晉人伐燕思溫統偏師拒之流矢中目裂裳漬血
戰猶不已爲周德威所擒莊宗壯而釋其縛久之日見信
用與梁戰於莘縣以驍勇聞授平州刺史兼平營薊三州
都指揮使神冊二年太祖遣大將經畧燕地思溫來降及
代渤海以思溫爲漢軍都團練使力戰拔扶餘城身被數
創太祖親爲調藥太宗卽位以功擢檢校太保保靜軍節
度使天顯十一年唐兵攻太原石敬瑭遣使求救上命思
溫自嵐憲間出兵援之罷兵改南京留守盧龍軍節度使
管内觀察處置等使開府儀同三司兼侍中賜協謀靜亂

竊聖功臣尋改臨海軍節度使會同初從耶律牒螭使晉
行冊禮還加檢校太師二年卒贈太師魏國公子延昭延
靖官至使相

張穀一作覺平州義豐人以進士仕至遼興軍節度副使
天祚之走山西也平州軍亂殺其節度使蕭諦里穀撫安
亂者州人推穀領州事秦晉王淳旣死蕭德妃遣時立愛
知平州穀知遠必亡練兵畜馬籍丁壯爲備立愛至穀弗
納金帥粘罕入燕首問平州事於故叅知政事康公弼公
弼曰穀狂妄寡謀雖有鄉兵彼何能爲示之不疑圖之未

永平府志

卷之十八

九

晚金人招時立愛赴軍前加穀臨海軍節度使仍知平州
旣而又欲以精兵三千先下平州擒穀公弼曰若加兵是
趣之叛也公弼請自往覘之穀謂公弼曰遼之八路七路
已降獨平州未解甲者防蕭幹耳厚賂公弼而還公弼復
粘罕曰彼無足慮金人遂改平州爲南京加穀試中書門
下平章事判留守事金人旣克燕驅燕之大家東徙以燕
空城及涿易檀順景薊州與宋左企弓康公弼曹勇義虞
仲文皆東遷燕民流離道路不勝其苦入平州言於穀曰
宰相左企弓不謀守燕使吾民流離無所安集公今臨巨

鎮握強兵盡忠於遠必能使我復歸鄉土人心亦惟公是望
望穀召諸將議皆曰聞天祚兵勢復振出沒漠南公若仗義
勤王奉迎天祚以圖中興先責左企弓等叛降之罪而誅之
盡歸燕民使復其業而以平州歸宋則宋無不接納平州
遂爲藩鎮矣卽後日金人加兵內用平山之軍外得宋爲之
援又何懼焉穀曰此大事也不可草草翰林學士李石智而多
謀可召與議石至其言與之合乃遣張謙率五百餘騎傳留守
令召宰相左企弓曹勇義樞密使虞仲文叅知政事康公弼至
灤河西岸遣議事官趙秘校往數

永平府志

卷之十八

二十

其十罪曰天祚播遷夾山不卽奉迎一也勸皇叔秦晉僭號二也
詆訐君父降封湘陰三也天祚遣知閣王自慶來議事而殺之
四也檄書始至有迎秦拒湘之議五也不謀守燕而降六也不顧
大義臣事于金七也根括燕財取悅于金八也使燕人遷徙失
業九也教金人發兵先下平州十也爾有十罪所不容誅企弓
等無以對皆縊殺之仍稱保泰三年畫天祚像朝夕謁事必告
而後行稱遼官秩榜諭燕人復業恒產爲常勝軍所占者悉還之
燕民旣得歸大遼翰林學士李石更名安弼偕故三司使高黨在
燕山

說宋王安中曰平州帶甲萬餘鼓有文武材可用爲屏翰不然將爲肘腋之患安中深然之令安弼與黨詣宋宋主詔帥臣王安中詹度厚加安撫與免三年常賦鼓聞之自謂得計金闕毋聞平州附宋以二千騎至營州鼓以精兵萬騎與戰于兔耳山闕毋大敗鼓報捷于宋宋建平州爲泰寧軍以鼓爲節度使以安弼黨爲徽猷閣待制令宣撫司出銀絹數萬犒賞鼓喜遠迎金人謀知舉兵來襲鼓不得歸奔燕金人以納叛責宋安撫司索鼓王安中諱之索之急斬一人貌類者與之金人曰非鼓也以兵來取安中

永平府志

卷之十八

三

不得已殺鼓函其首送金燕京降將及常勝軍皆泣下

案金

史列之叛臣傳鼓在遼固不得爲純忠亦豈金之所得而書叛者乎今采遼史天祚本紀補之

金趙興祥平州盧龍人六世祖思溫遼燕京留守封天水

郡王

遼史但云贈魏國公

父瑾遼靜江軍節度使興祥以父任閣門

祇候謁告省親于白霄會土賊據郡作亂興祥携母及弟妹奔燕京不能進乃自柳城涉砂磧夜視星斗而行僅達遼軍而不知遼主所向遂還柳城及婁室獲遼主興祥乃歸國從宗室爲六宅使天眷初累官同知宣徽院事母憂去官熙宗素聞興祥孝行及英悼太子受冊以本官

起復護視太子轉右宣徽使天德初改左宣徽使海陵嘗
問興祥欲使子弟爲官當自言興祥辭謝海陵善之賜以
玉帶詔曰汝官雖未至一品可佩此侍立爲濟南尹改絳
陽軍節度使召爲太子少保封廣平郡王改封鉅鹿正隆
初例奪王爵遷太子少傅封申國公起爲武定軍節度使
海陵伐宋興祥二子從軍世宗卽位海陵尚在淮南二子
未得還興祥來見於平州世宗嘉其誠欵以爲秘書監復
爲左宣徽使久之以其孫珣爲閣門祗候十五年上幸安
州春水召興祥赴萬春節上謁于良鄉賜銀五百兩卒官
永平府志

卷之十八

三

劉敏行平州人登天會三年進士除太子校書郎累遷肥
鄉令歲大飢盜賊掠人爲食老弱入保郡城不敢耕種敏
行白州借軍士三十護縣民出耕多張旗幟爲疑兵敏行
率軍巡邏日暮則關門入城由是盜不敢犯而耕稼滋殖
轉高平令縣城圯壞久不修大盜恣掠縣鎮不能禦敏行
出已俸率僚吏出錢僱役繕治百姓欣然從之凡用二千
人版築遂完鄉村百姓入保賊至不能犯九遷爲河北東
路轉運使致仕卒

孟浩字浩然灤州人遼末登進士第天會三年爲樞密院

令史除平州觀察判官天眷初選入元帥府備任使承制
除歸德少尹充行臺吏禮部郎中入爲戶部員外郎郎中
韓企先爲相拔擢一時賢能皆置機要浩與田穀皆在尚
書省穀爲吏部侍郎浩爲左司員外郎既典選善銓量人
物分別賢否所引用皆君子而蔡松年曹望之許霖皆小
人求與穀相結穀薄其爲人拒之松年因以事構陷穀坐
死其妻子及浩等三十四人皆徙海上仍不以赦原世宗
在熙宗時知浩等寃及卽位召見以浩爲侍御史尋爲左
司員外郎浩篤實遇事言無所隱上加其忠有疾求外補

永平府志

卷之十八

三

除祁州刺史致仕歸七年起爲御史中丞浩年老世宗以
不次用之再閱月拜叅知政事故事無自中丞拜執政者
浩辭上曰國家用人豈拘階次卿公正忠勤雖年高猶可
宣力數年朕思之久矣浩頓首謝世宗勅右司東宮涼樓
增建殿位浩諫曰皇太子義兼臣子若所居與至尊宮室
相侔恐制度未宜當示以儉德上曰善遂罷其後進尚書
右丞兼太子少傅罷爲真定尹以通犀帶賜之十三年薨
王信字立斯灤州人屢試鄉薦不第天會二年以戶紀從
元帥屢戰有功皇統五年特授信武將軍九加至鎮國上

將軍開國侯四任縣令判橫海軍皆以廉平稱先業俱謹
諸弟蔭敘首及弟姪

李元璋字寶臣灤州人詞賦進士元道之弟少穎悟每數
千言一覽成誦未弱冠登正隆元年律科上第任西北路
招討知法有能名陞左三品校法歷石城主簿豐潤縣丞
夏津令泰和間訪山東官能幹者璋為第一章宗特旨宣
問擢吏部尚書官至少中大夫上護軍府隴西郡開國侯
食邑二千元實封一百戶賜紫金魚袋元璋事父母甚謹
公餘拱立父側命退乃退溫清覲省曲盡其禮鄉邦稱之

永平府志

卷之十八

十四

州志四子邢基恭子鎮監酒邢秀忠頭校尉邢彥平州觀
察推官邢獻以文字科出身授元平涿路副都總管府志
系緯警使纓千戶綱惠州同知
經元帥府鎮撫繪敦武校尉

張僅言幼名元奴毅之子也宗望攻下平州僅言在襁褓
間里人劉承宣得之養於家其鄰韓夫人甚愛之年數歲
因隨韓夫人得見貞懿皇后留之藩邸稍長侍世宗讀書
遂使僅言主家事繩檢部曲一府憚之世宗留守東京海
陵用兵江淮將士往往亡歸詣東京願推戴世宗為天子
僅言勸進世宗即位除內藏庫副使權發遣官籍監事海
陵死揚州僅言與禮部尚書烏居仁殿前左衛將軍阿虎

帶御院通進劉琬發遣六官百司圖書府藏在南京者還以本職提控尚食局轉少府監丞仍主內藏僅言能心計世宗倚任之凡宮室營造府庫出納行幸頓舍皆委之世宗嘗曰一經僅言無不愜朕意者六年提舉修內役事後夫掘地得白金匿之事覺法當死僅言責取其物與官釋其罪尋兼祇應司遷少府監提控宮籍監祇應司如故護作太寧宮引宮左流泉溉田歲獲稻萬斛十七年復提點內藏典領昭德皇后山陵遷勸農使領諸職如故僅言雖舊臣出入左右然世宗終不假以權任二十一年尚書省

永平府志

卷之十八

三十五

奏宮苑司直長黎倫在職十六年請與遷敘上曰此朕之家臣質直人也今已老矣如勸農使張僅言亦朕舊臣純實頗解事凡朝廷議論內外除授未嘗得干預朕觀自古人君爲讒語蒙蔽者多矣朕雖不及古人然近習儉言未嘗入耳宰臣曰誠如聖訓此國家之福也世宗欲以爲橫海軍節度使而不可去左右遂止僅言始得疾猶扶杖視事疾亟詔太醫診視近侍問訊相屬及卒上深惜之遣官致祭賜銀五百兩重緜十端緇二百疋棺槨衣衾銀永歛物葬地皆官給贈輔上將軍

張景仁字壽甫遼西人累官翰林待制大定二年僕散忠義伐宋景仁掌其文辭宋人議和朝廷已改奉表爲國書稱臣爲姪但不肯世稱侄國往復凡七書然後定其書皆景仁爲之世宗稱其能嘗曰今之文章如張景仁與宋人往復書指事達意辨而裁真能文之士也五年罷兵入爲翰林直學士七年遷侍講八年遷翰林學士同修國史十年兼太常卿學士同修國史如故轉承旨兼修國史改河南尹二十一年召爲御史大夫仍兼承旨修國史未幾詔葬元妃李氏于海王莊平章政事烏古論元忠提控葬事

永平府志

卷之十八

三

都水監丞高景壽治道路不如式元忠不奏決之四十景仁劾奏元忠輒斷六品官無人臣禮上曰卿劾奏甚當使左宣徽使蒲察鼎壽傳詔戒勅之元忠尚豫國公主怙寵自任慢朝士景仁劾之朝廷肅然是歲薨

趙質字景道遼相恩溢之裔大定末舉進士不第隱居燕城南教授爲業明昌間章宗遊春水過之聞絃誦聲幸其齋舍見壁間題詩諷詠久之召至行殿命之官固辭曰聖明在上願託巢由爲外臣上益奇之賜田千畝復之終身泰和二年卒年八十五

王元粹平州人爲南陽酒官有詩名詩見中州集

按元粹王鬱傳

同以詩鳴者雷館侯冊王元粹云

趙思文平州人累官至禮部尚書時朝廷多難思文在閭關羈旅中未嘗墮于非禮時人稱之

張介字介甫平州人正大元年經義進士第一爲國用安參議用安表請哀宗幸山東上以其言示宰臣宰臣奏用安反覆本無匡輔志此必參議張介等爲之業已遷蔡議遂寢

元鮮卑仲吉中山人歲乙亥國兵定中原仲吉首率平灤永平府志

卷之十八

三

路軍民詣軍門降太祖命爲灤州節度使從阿木魯南征克右副元帥攻取信安關州諸城以功賜虎符授河北等路漢軍兵馬都元帥歲壬辰平蔡有功加金吾衛上將軍與平路都元帥右監軍永安軍節度使兼灤州管內觀察使提舉常平倉事開國侯尋卒子準克管軍千戶從札台火兒赤東征高麗中統元年賜金符扈駕征阿里不哥以功受上賞三年從征李璫至元十年授侍衛親軍千戶昭武大將軍大都屯田萬戶佩虎符卒子誠襲授宣武將軍高郵上萬戶府副萬戶佩虎符改授懷遠大將軍僉武衛

親軍都指揮使司事領兵征瓜哇攻八百媳婦國使廣東

克勤于役尋以疾卒子忽篤士襲

以上元史本文 舊志 甲仲吉字慶仲漆州人

姓出鮮卑漢有北平太守躬太傅掾整皆以卑姓顯世次遠不可考仲吉先家中山石晉末徙漆西萬石山下後爲義豐卑氏莊人祖謙父彥明孝養尚節氣好給施金貞祐元年卒亂不克葬于何長子仲成避嵐山流矢貫頰仲吉負走及土嶺崗乃死火其骨抱歸歲凶疫大亂仲吉日令家人掘菑苳以食有貸者倒囊與之州牒令監遷安園粟凡求者卽資之園爲空素與巡檢許枚善枚死父老無所歸載之家事惟謹及終還其葬仲吉膺選勇敢克副統平州陷郡中豪傑推權領永安軍事乙亥首率漆州軍民詣蒙古軍門降丁丑以破賊功拜本州節度使兼管內觀察使躬耕隴上與百姓同勞苦妻孥亦蚕織自給於是郡人爭務勤本號令嚴肅境內以安丁亥進金吾上將軍兼授金虎符許世傳贈父如其官葬父以兄骨附未幾入覲遣副阿木會諸將南征信安諸寨寨城四面阻水金北平公

永平府志

卷之十八

天

張進獨固守不下仲吉以漆人王仲添爲副都統仲添膽畧過人同士卒甘苦且耕且戰爲持久計敵至城下與都統趙簡松引兵逆戰少却簡松陷敵軍仲添入其陣擊刺所向披靡以簡松出雖中流矢必戰罷而後取獨殿以歸戊子四月信安兵復至仲添被圍鏖戰至晚力盡死之辛卯以破諸城功爲兵馬都元帥將四行臺六總管壬辰春兵將南征會行省蘓椿叛中外震擾仲吉與主將定之或欲盡屠其衆仲吉日椿反百姓何與於是魏人遂定大駕南下一日卧營中主將外來謂日受勅盡殺在營諸俘仲吉力言不可附主將以奏上甚喜悉除前令明年從征邳州降之主將欲屠其城仲吉止之全活以數萬計甲午還家仲吉性聰悟通鑑一過歷歷上口凡與人論輒引古人行事折中之居無何以舊勳起爲興平路兵馬都元帥總管上將軍平漆總管右監軍永安軍節度使兼漆州管內觀察使提舉常平倉事開國侯仲吉請闕以老病辭不許日右北平易治吾欲汝卧鎮焉賜之燕令位在侯上甲辰年秋孟以疾薨於家年五十有七仲冬葬于萬石山先人兆次娶五氏爲夫人有子十人鞏肇群萃庠中準華章常

以華襲爵年十七肇年十六射虎西山下群獫狁辯而能
文萃能家庠勤學中隼以下皆幼孫六人女一十三人後群權
後群權漆州節度使立神道碑勒銘

趙炳字彥明惠州灤陽人父弘有勇畧國初爲征行兵馬
都元帥積階奉國上將軍炳幼失怙恃依於從兄歲飢往
平州就食遇盜欲殺之兄解衣就縛炳年十二泣請代兄
盜驚異舍之而去甫弱冠以勲閭之子侍世祖於潛邸恪
勤不怠遂蒙眷遇世祖次桓撫間以炳爲撫州長城邑規
制爲之一新己未伐宋會北方有警括兵歛財燕薊騷動
王師北還炳遠迂中途具以事聞追所括兵及橫歛財物
永平府志

卷之十八

三

悉歸於民世祖嘉其忠中統元年命判北京宣撫司事北
京控制遼東番夸雜處號稱難治時參知政事楊果爲宣
撫使聞炳至喜曰吾屬無憂矣三年括北京鷹坊等戶丁
爲兵蠲其賦令炳總之時李璫叛據濟南炳請討之國兵
圍城炳將千人獨當北面有所俘獲卽縱遣之濟南平入
爲刑部侍郎兼中書省斷事官時有携妓登龍舟者卽按
之以法未幾其人死其子犯蹕訴寃詔讓之炳曰臣執法
尊君職當爲也帝怒命之出旣而謂侍臣曰炳用法太峻
然而非徇情者改樞密院斷事官濟南妖民作亂賜金虎

符加昭勇大將軍濟南路總管炳至罪首惡餘黨解散處
凶發廩賑民而後以聞朝廷不之罪也遷遼東提刑按察
使豪猾屏迹至元九年遷京兆路總管兼府尹皇子安西
王開府於秦有吏卒橫暴擾民者卽自繩以法王命之曰
後有犯者勿復啟請若自處之自是豪猾斂戢有旨以解
州鹽賦給王府經費歲久積逋二十餘萬緡有司追理僅
獲三之一炳密啟王曰十年之逋責償一日其孰能堪與
其哀歛病民孰若惠澤加於民乎王善其言遽命免徵會
王北伐詔以京兆一年之賦充軍資炳復請曰所徵逋課

永平府志

卷之十八

三

足佐軍用可貸歲賦以蘓民力令下秦民大悅十四年加
鎮國上將軍安西王相王府冬居京兆夏徙六盤山歲以
爲常王旣北伐六盤守者構亂炳自京兆率兵往捕南丹
旬元惡授首十五年春六盤再亂復討平之王還自北嘉
賞戰功賚賜有加十一月王薨十六年秋被旨入見便殿
帝勞之曰卿去數載衰白若此關中事煩可知已詢及民
間利病炳悉陳之因言王薨之後運使郭琮郎中郭叔雲
竊弄威柄恣爲不法帝臥聽遽起曰聞卿斯言使老者增
健飲以上尊馬湏改中奉大夫安西王相兼陝西五路西

蜀四川課程屯田事餘職如故卽令乘傳借勅使數人在
按琮等至則琮假嗣王旨入炳罪收炳妻孥囚之時嗣王
之六盤徙炳等於平涼北崆峒山囚閉益嚴炳子仁榮訴
於上卽詔近侍二人馳駟而西脫炳且械琮黨偕來琮等
留使者醉以酒先遣人毒炳於平涼獄中其夜屋隕有聲
如雷年五十九俄械琮等百餘人至帝親鞫問盡得其情
命仁榮手刃琮叔雲於東城籍其家以付仁榮仁榮曰不
共戴天之人所蓄之物何忍受之帝善之別賜鈔二萬二
千五百緡爲治喪具贈中書左丞謚忠愍子六人仁顯蚤

永平府志

卷之十八

三

仁表仁榮仁旭仁舉仁執仁榮仕至中書平章政事仁
舉登至元中進士知晉州政清訟理人爲立碑餘俱登顯
仕

陳顥字仲明其先居廬龍有名山者仕金爲謀客太祖得
之以爲平陽等路軍民都元帥子孫徙清州遂爲清州人
顥幼穎悟日記誦千百言稍長游京師登翰林承旨王磐
安藏之門磐熟金與章安藏通諸國語顥兼習之安藏乃
薦顥入宿衛尋爲仁宗潛邸說書於是仁宗奉母后出居
懷慶顥從行日開陳以古聖賢艱貞之道仁宗入定內難

遜武宗顯皆預謀及仁宗卽位以舊勳特拜集賢大學士
夢祿大夫仍宿衛禁中政事無不與聞科舉之行蓋贊助
之力尤多顯時伺帝燕閒取聖經所載大經大法有切治
體者陳之每見嘉納帝嘗坐便殿群臣入奏事望見顯喜
曰陳仲明在列所奏必善事矣顯以父年老力請歸養青
州帝特命顯長子孝伯爲知州以就養顯固辭乃以孝伯
爲州判官帝欲用顯爲中書平章政事顯辭而止仁宗崩
辭祿家居者十年文宗卽位後起爲集賢大學士上疏勸
帝大興文治增國子學弟子員蠲儒生徭役皆嘉納焉顯
永平府志

卷之十八

三

先後居集賢薦士累數百有訐之者顯曰吾寧以謬舉受
訶蔽賢誠所不忍順帝元統初顯扈蹕行幸上都至龍虎
臺帝命造膝前握其手曰卿累朝老臣更事多矣凡政事
官極言無隱顯頓首謝不敏後至元四年致政食全俸于
家明年卒年七十六至正十四年贈摠誠秉義佐理功臣
光祿大夫河南江北等處行中書省平章政事柱國追封
薊國公謚文忠顯出入禁闥數十年樂談人善而惡聞人
過大夫士因其薦拔以至顯列有終身莫知所自者是以
結知人主上下無有怨尤次子敬伯至正中仕爲中書叅

知政事歷左右丞二十七年拜中書平章政事

周宏字希道遷安人尹真定無極調遼陽寧昌俱有惠政至正間調昌黎撫字有方利澤及人平章程思忠亂據永平宏率民拒守城陷被執宏七日不食罵不絕口而死

其見於各志及碑記者北魏有青州刺史韓秀昌黎公屈遵襄城公盧魯元尚書盧醜俱古昌黎人有文學韓麒麟亦昌黎人拜齊州刺史居官恭慎廉惠封燕郡公子顯宗甲科爲中書侍郎性剛直能面折廷諍隋有豆盧通亦昌黎人祖長父寧俱顯於魏通仕隋歷夏洪二

永平府志

卷之十八

三三

州總管弟勣滑州刺史封楚國公俱有惠政勣子毓以發漢王諒逆謀遇害封正縣侯唐有李惠登古柳城人隋州刺史政尚清靜李光弼亦柳城人中興功第一封臨淮王昌黎又有慕容善行曾徵爲修文學士金有齊陶其先弘政人徙居馬城官明威將軍以好義稱鮮于仲權李杭俱樂亭進士以文學稱元有王統樂亭人子仲仁仲仁子珪瑣珍珍子祥並有武功爲大帥姚樞柳城人有王佐才世祖召至首陳治平大經凡內修外攘之政咸任焉官至學士崔煜遷安人程思忠之亂有保

障功官至叅政楊紹先樂亭人官集賢學士齋經史千
八百卷藏于州學學正秦本記之子有道爲永平路經
歷以職田之餘隸州學學正張德記之程銳灤州人捐
資建沂河橋張勗昌黎人官至學士趙衍灤州人官至
司業並有文名齊泰樂亭人爲登封簿九載有政績葛
弘石城人舉賢良爲本縣令忠厚好施吉士寬灤州人
子大用孫巨昌世行其德累官贈其父爲河南郡侯皆
得附見焉

永平府志卷之十八終

永平府志

卷之十八

三十四